

Die Fassenacht muss unbeweechlich werrn

Moin ahle Kumpel Schorsch hott sich ferrs neie Johr was vorgenumme: Er will sich nimmi uffreeche.

Wie willsden dess mache, habb ichen gefroocht, grad jetz gibts doch so vill, iwwer dess merr sich uffreeche kennt, dess fängt doch schunn mette Fassenacht oo, weil die so frieh iss dissjohr.

No ja, moont de Schorsch, doo konnsde doch sowieso nix droo mache. Wenn de Vollmond oon Daach nooch Friehlingsoofong wie dissjohr uffen Freidaach fällt doo werdd der automatisch zum Karfreidaach unn zwaa Daach denooch iss halt Ostersunndaach. Unn wenn Ostern frieh iss, donn iss aach die Fassenacht frieh.

Ich saach: Awwer wunnern derf merr sich schunn, dass sich kooner iwwer die korz Fassenacht uffreeche dut. Ich denk, die Nann von Münche iwwer Meenz bis Köln finne sich oofach doodemett ab. No ja, doo misst sich die Industrie mol drum kimmern.

De Schorsch hott mettem Kopp gewackelt. Ei was soll die Industrie dann mache, erzähl merr dess emol.

Ich saach: Guckemol Weihnachte, dess iss halt jed Johr um die selb Zeit unn doo kenne sich die, die Gutsjer unn Schokoladennikkeloose mache, schunn Monate vorher druff oistelle. Ab Oktower mache die immer mehr Reklame, dann werdd im Advent kräfdisch uff die Pauk gehaa, verkaafsoffene Sunndaache gemacht – unn guck, die Leit kaafe, obse Geld hawwe odder nit.

Jetz wusst de Schorsch was ich wollt unn schunn issem was oigefalle: Eichentlich hosde Recht, Honnes, weil mett dem – wie heeßt dess, was die so Ende Oktober mett so Geister unn mettem Dracula feiern?

Hellowien, habb ich zur Ontwort gewwe, Hellowien, dess werdd immer in de Nacht vorm ersde November gefeiert.

Ja Hellowien, sacht de Schorsch, ich kann mich noch droo erinnern: Iwwerall hosde so Kosdüme unn Fratze unn so Zauberzeich gesehe. Die große Geschäfte wisse wonn dess iss unn stelle sich friehzeidich druff oi. Unn schunn werdd enn Haufe Zeich verkaaft. Awwer genau dess konnsde halt nit mache, wenn Fassenacht oomol frieh unn e onnermol spät iss. Ostern unn Fassenacht sinn halt beweechlich, doo kennese all nix droo mache.

Dess denkst aach nor du, habb ich gesacht, was glaabsde dann, wenn die erst emol druffkumme, dass merr mette Fassenacht mehr Geschäfte mache kann, wenn Fassenacht e unbeweechlich Fest werdd, also saache merr mol immer omm ersde Sunndaach im März iss? Doo hawwe die mehr wie zwaa Monat Zeit, ihr Zeich in die Fenster ze hänge, Prospekte ze drucke unn aach korz vor de Fassenacht enn verkaufsoffene Sunndaach ze mache. Unn waaßde wenn dess kimmt?

Naa, sacht de Schorsch, wonn kimmden dess?

Ich habb versucht nit ze grinse. Schorsch, dess kimmt dann, wenn die Geschäftemacher unserne Politiker klar mache, dass doodemett 100.000 Arweitsplätz geschaffe werrn. Unn glaab merrs, bei so emm Argument knickesse all oi, obse on Ostern in die Kerch gehe odder nit.

De Schorsch hott mich oogeguckt. Honnes, komisch, irchendwie kimmt merr die Sach mette Arweitsplätz zimmlich bekohnt vor. Awwer moonsde ich kām druff wieso?

Eiern Honnes